

2019

AÑA DI FAMILIA
Y DI CUIDO DI NOS
MUCHANAN

ISLA(•)NLINE

Diaranson 29 Mei 2019

Email: prensa@arubagovernment.aw Tel: 528-4900

CU UNION Y PAS TIN
PROSPERIDAD



GOBIERNO DI ARUBA

Mei 2019


MINISTER EVELYN WEVER-CROES
Prome Minister di Aruba

AUDIENCIA CU PAPA DI ROMA:

Pa Premier Wever-Croes tawata un imenso honor y gran alegria pa trece un poco mas di Aruba cerca di Papa di Roma

“Awe mi tawata tin e honor pa haya audiencia cu Papa Francisco di Roma”. Tawata un experiencia unico y tabata un honor di por a representa Aruba y ricibi e bendicion pa henter Aruba, Premier Evelyn Wever-Croes a expresa cu gran alegria diaranson mainta.

Awe diaranson ta dia di audiencia general na Plaza San Pedro na Roma. Un multitud grandi a bin na e sirbishi special aki pa ricibi bendicion di Papa Francisco. Premier Wever-Croes y su esposo tawata sinta riba prome fila na banda di e podium. Despues di audiencia general, Premier Wever-Croes a haya un oportunidad pa un audiencia priva cu Papa di Roma.

“Mi a conta Papa Francisco cu Aruba ta un isla chikito den Caribe cu un poblacion cu ta consisti di 75% catolico, sin laga afo e bendicion cu Aruba tin cu nos Kapel di Alto Vista y e debocion grandi na Mama Maria di Alto Vista. Mi a pidi Papa Francisco pa Bendicion pa Aruba, pa nos famianan na Aruba, pa nos Gobierno. Mi a pidi tambe pa tene Aruba, Boneiro, Corsou y Venezuela den oracion y duna nos bendicion. Venezuela tin mester di bendicion mas cu nunca pa e situacion dificil cu nan ta pasando aden cua situacion ta afectando nos tambe”, Premier Wever-Croes a duna di conoce.

Premier Wever-Croes a haci un invitacion na Papa Francisco pa e bin Aruba. Pa Premier Wever-Croes tawata un momento hopi grandi y emocional ora cu na final Papa Francisco a duna su bendicion pa henter pueblo di Aruba.

Den number di pueblo di Aruba, Premier a entrega Papa Francisco un bunita cuadra di Kapel Alto Vista y tambe un buki di historia di Aruba den cua e bunita historia di Kapel di Alto Vista ta wordo splica.



“Papa di Roma ta un persona hopi humilde, cu un curason hopi grandi y hopi amabel. Esaki ta e prome biaha cu mi por a aprecia Papa di cerca asina y mira cu Papa ta genuino den su gestonan cu e ta haci pa cu religion catolico y henter mundo. Aparte di esey, e ta un lider y mi ta confia cu Papa lo logra trece pas caminda cu tin mester. Mi a experencia un dia hopi bunita na unda cu Papa a bendiciona Aruba, Corsou, Boneiro y Venezuela. Y

alaves, Papa a gradici Aruba tambe pa ta dispuesto pa yuda y acepta asina tanto pa cu e situacion di Venezuela. Papa Francisco a bisa cu sigur e lo tene nos den oracion. Pa mi esaki ta un dia hopi special y un imenso honor pa representa Aruba na Vaticano y trece un poco mas di Aruba cerca di Papa di Roma”, Premier Wever-Croes a expresa.

Prome Minister Evelyn Wever-Croes:

PREMIER EVELYN WEVER-CROES A REUNI CU COMISION DI REINO DI EERSTE KAMER DI HULANDA

Durante su bishita na Hulanda Premier Evelyn Wever-Croes a pidi un reunion cu e miembronan di senado Hulandes pasobra ta importante pa nan ta bon informa riba diferente topico door di e Premier mes.

VENEZUELA:

"E crisis di Venezuela no ta un crisis di Venezuela so, e no ta un crisis regional so, e ta un crisis mundial y comunidad mundial mester yuda carga e peso. Aruba y Corsou ta cargando un parti relativamente grandi di e peso, y nos so no por sigi carga. E miembronan di senado Hulandes tabata tin hopi interes pa e topico aki y a hasi hopi pregunta. Nan a keda agradecido di por a haya splicacion detaya" segun Premier Evelyn Wever-Croes.

FINANSAS PUBLICO:

En bista cu finanzas publico den pasado a causa bastante friccion entre Hulanda y Aruba, Premier Evelyn Wever-Croes kier a duna Eerste Kamer un update. A splica cu desde cu a firma e protocol nobo cu Hulanda, a bin poco mas tranquilidad den e relacion entre Hulanda y Aruba, y cu e confiansa ta wordo reestableci. E protocol ta basa riba e memorandum financiero economico cu Gabinete Wever-Croes mes a prepara. No kiermen cu e problemanan financiero di Aruba a wordo soluciona. Al contrario, e problemanan ainda tey pero awor tin un plan y a base di e plan, Aruba lo sali di e problemanan financiero. Aruba lo cumpli cu palabracionnan haci.

INTEGRIDAD:

Ta conoci cu e escandalo di corrupcion den cual un ex minister di AVP tabata involvi, a wordo discuti tambe na Hulanda. P'esey tabata importante pa Premier Evelyn Wever-Croes splica kico Gobierno di Aruba ta haciendo pa evita algo asina bolbe pasa. Premier a elabora riba e Bureau Integriteit, e Integriteitskamer y e Corporate Governance Code pa asina Aruba por ratifica e tratado contra corrupcion di Nacionan Uni. E miembronan di senado a keda impresiona cu e plannan ambicioso di Gabinete Wever-Croes.

"Na mi opinion e reunion a bay hopi bon. Mi a duna informacion y nan a haci hopi pregunta. Na final nan a gradici mi pa e informacion y a desea nos hopi exito cu tur e retonan na Aruba. Awor cu nan ta miho informa, nan lo por duna miho sosten na Aruba", segun Premier Evelyn Wever-Croes.




 MINISTRE OTMAR ODUBER

Minister di Desaroyo Teritorial, Infraestructura y Medio Ambiente

MAS GRUPO DI PERSONA TA RICIBI OPORTUNIDAD PA CONSTRUI NAN HOGAR

Desde introduccion di e maneho nobo pa entregamento di tereno pa construccion di cas DIP a bin ta organisa eventonan di pre-reservacion. E eventonan aki ta basa ariba gruponan di peticionan di diferente añanan. Na aña 2018 a trata tur esnan cu a haci un peticion prome cu aña 2000 y cu a reconfirma na aña 2003 y a yega te cu un gran parti te cu aña 2005. DIP a cuminsa e aña aki cu e siguiente grupo di 2005 y a caba esaki na maart cu a pasa. E siguiente evento a tuma luga 29 di mei, tur persona cu a haci un peticion na aña 2006 y 2007 cu a pasa e screening di DIP di e parti aki a haya un carta di invitacion pa e anochi di informacion aki.

Otorgamento di e carta di pre-reservacion; e carta di pre-reservacion ta e prome stap pa por yega na remarke pa un tereno erfpacht, e carta aki tin algun condicion cu e cliente mester tene cuenta cu ne. Na e momento cu e ricibi e carta aki y e fecha ta di 29 di mei e cliente tin 30 dia pa entrega un carta di un entidad financiero pa di e manera aki nos por mira kico nan ta haya di financiamento of si e cliente lo por tin placa cu a spaar unda cu e por usa esaki pa construi su cas. E 30 dianan no ta wordo prolonga pues ta hopi importante pa haci enfasis den esaki.

E grupo di dia 29 a yega un total di 906 persona cu a wordo invita pa e atardi aki y te ainda esaki ta parse di ta e grupo record cu DIP tabatin den tur e evento nan te cu awo. 906 persona y DIP ta spera cu mayoria lo por bin na remarke y por sigui e proceso pa cu esaki.

Varios biaha caba a invita entidadnan financiero pa forma parti di e anochi di informacion aki y e biaha aki no ta excepcion. Incluso e biaha aki a involucra otro entidadnan financiero cu no ta esunnan tradicional. E biaha aki nos por conta cu presencia tambe di Ennia y Pensioen Fonds Tourism Center como tambe banconan manera, Aruba Bank, CMB, RBC Royal Bank, FCCA & APFA.

Nan presencia ta pa duna e clientenan presente informacion kico nan mester tin na momento di bin pa nan afspraak cu banco of na e compania concerni pa ricibi e carta como tambe e posibilidad di traha un cita adelanta. Ta urgi tur cu lo tey presente pa haci bo cita di biaha cu e entidad financiero di bo preferencia, mirando cu e 30 dia nan no ta wordo prolonga, y di e manera aki bo por tin bo cartanan na tempo. Asina ta cu ta hopi importante pa e cliente haci uso di e oportunidad di haci su cita na e banco of e compania cu e ta desea e atardi aki y cu e proceso aki lo por cana mas lihe.



PROYECTO DI CONTROL RIBA UTV TUMANDO LUGA

29 di mei, DTI ta hunto cu KPA y DTP den e proyecto di controla UTV y ATV na diferente caminda na Aruba, aportando na mas seguridad riba nos caminda.

Como doño di tour, rental of otro tipo di compania, pa no tin problema cu bo clientenan ta pasa momentonan fastioso ora tin control di polis, bin traha afspraak pa keur na DTI.

DTI tambe ta haci e yamada aki na nos busnan di tour y otro ekipo cu ta huur of wordo uza pa entretene nos turistanan.

Nos tur tin nos obligacionnan pa percura cu nos ta tene seguridad halto, especialmente nos pilar di nos economia, nos turista.



Awe mainta nos tabata presente na e Santo Sacrificio di Misa enconexion cu e celebracion di 90 Aña di DOW. A yama danki y a gradici Papa Dios na tur esnan cu den un forma of otro a contribui cu e departamento, of ainda ta forma parti di DOW.

Pabien na cada empleado di DOW.



A portrait of Minister Xiomara Ruiz-Maduro, a woman with dark curly hair, smiling. She is wearing a light-colored blazer over a dark top. The background is a blue and white geometric pattern.

MINISTER XIOMARA RUIZ-MADURO

Minister di Finansa, Asuntonan Economico y Cultura

Minister Xiomara Ruiz-Maduro:

PARLAMENTO A APROBA CAMBIO DI E LEY DI DESTAHO UNANIMAMENTE

Dialuna mainta Parlamento di Aruba a trata e Ley di Destaho caminda cu ta regla e proceduranan pa destaho publico, priva y otorgacion directo. E ley actual a conoce cambionan pa asina por cumpli cu e principionan di bon gobernacion na momento di un destaho. Den e ley a regla, entre otro, e mandato di e directornan ora di destaho y a crea e posibilidad pa haci un destaho priva (onderhandse aanbesteding) via medio electronico.

E cambionan ta cuadra cu e maneho di Gabinete Wever-Croes pa modernisa nos leynan, demostra transparencia y integridad den gobernacion, como tambe cumpli cu e protocol firma dia 30 di maart 2012 na Geneve den cual e punto di salida ta bon gobernacion y e enfoke riba transparencia den maneho di fondonan publico di Pais Aruba. Pa por cumpli cu esakinan tabata necesario bin cu cambio den nos leynan referente e diferente forma di destaho, suministro di producto y prestacion di servicionan cu mester wordo realiza den proyectonan di Gobierno di nos Pais, como tambe e proceduranan corespondiente cu mester wordo aplica y sigui.

E cambionan den ley a wordo aproba unanimamente pa Parlamento di Aruba y ta un trabou cu a wordo haci principalmente pa e 'Werkgroep Arubaans Comptabel Bestel' pa cual Minister Ruiz-Maduro ta expresa palabra di gratitud pa nan trabou y ta gradici tambe tur otro persona cu a traha riba e cambionan den e Ley aki.



Como Territory Authorizing Officer di OCTA pa Aruba: MINISTER RUIZ-MADURO A REUNI CU DELEGACION DI KULEUVEN ENCARGA CU E FACULTAD DI SISSTEM PA ARUBA

Dialuna anochi Minister Ruiz-Maduro a comparti un rato ameno cu e delegacion di KULEuven, ehecutivonan di Universidad di Aruba y directora di Departamento Economico. E delegacion di KULEuven ta na Aruba pa haci e preparacionnan necesario pa e facultad di SISSTEM cu ta cuminsa cu e estudionan riba nivel di Bachelor september awor na Universidad di Aruba.

E facultad di SISSTEM ta bira posibel na Aruba danki na fondonan di desaroyo Europeo cu recientemente a keda aloca pa nos Pais. KULEuven ta e universidad cu a keda encarga cu e curiculo di e facultad nobo aki y oficina regional pa desaroyo di Nacion Uni tin na su encargo pa renoba y ekipa e edificio monumental di Maria Convent pa acomoda e facultad di SISSTEM cu lo brinda estudio Bachelor y Master den Ciencia, Tecnologia, Ingenieria y Mathematica y tambe lo concentra riba un Doctorado den Sostenibilidad.

Cu binida di e facultad di SISSTEM na Aruba nos ta cuminsa concretisa tambe e sector prometededor di Economia di Conocemento ya cu dentro di e facultad aki lo aloca tambe un Centro di Excelencia riba Sostenibilidad pa asina por haci compilacion di informacion, investigacion, implementacion y



exportacion di e conocimiento riba e tereno di sostenibilidad.

Minister Ruiz-Maduro ta gradici y desea e team di KULEuven y Universidad di Aruba hopi exito cu e proyecto bunita aki pa enseñansa y economia di nos Pais. Palabra di gratitud tambe ta bay na Departamento Economico cu a percura pa tur e tramitenan pa haci posibel pa e fondonan di desaroyo Europeo por a keda aloca pa Aruba por conta awor cu e bunita proyecto aki.

AnThropical

E Era Nobo di Rasonamento / E Era di Re-Coleccion.

Alydia Wever.

Bo persona ta cordialmente invita pa un anochi di lectura y presentashon di e proyecto Anthropolical. Un obra crea pa e artista contemporaneo Alydia Wever representando Aruba na e di 13 Biental di Havana, Cuba.

Pa cu e proyecto multidisciplinario aki Alydia a escoge tres artista visual Kevin Schuit, Glenda Heyliger y Ryan Oduber y tres bailado Eva Croes, Kevin Gumbs y Orwin Gomes. E trahe nan a ser diseña pa un diseñadora Hulandes Doriene van der Wijst.

E presentacion y exposicion ta representa e relacion entre Aruba, Reino Hulandes y Europa. Atraves di cuatro instalacion di arte y un proyecion di video arte. Cada artista ta refleksja atraves di su obra su propio recuerdo di su repertorio cultural. E obhetivo ta consisti di explora su raisnan cultural y reconecta cu e spirito Caribense.

E presentacion y video di e proyecto Anthropolical lo worde presenta dor di artista Ryan Oduber.

Tema di lecturanan:

- "Mitonan Colonial y (de)formacion di Identidad Caribense." dor di Luc Alofs.
- "Herencia immaterial y e Museo Bibi - Rancho" dor di Clifford Rosa.
- "Biental di Arte y su impacto pa un pais y e artista" dor di Ana Maria Hernandez.

Dia **Diarason 29 di Mei**

Luga **"Fruteria" na Museo Arqueologico Aruba
Schelpstraat 42, Oranjestad, Aruba.**

Ora. **7:30 pm**



www.alydiaweever.com/anthropolical



Kingdom of the Netherlands



La Construcción
de lo Posible
DEL 15 EN ABRIL AL 15 DE MAYO DEL 2019



Minister Ruiz-Maduro cu bon noticia:

FINANSA PUBLICO TA RIBA BON CAMINDA - DEFICIT TA BIRANDO SURPLUS Y TASA DI DEBE TA CUMINSA STABILISA




Durante conferencia di Prensa e siman aki Minister di Finansa a trece dilanti cu ela ricibi e resultadonan di e promer kwartaal di e ehecucion di Presupuesto 2019. E cifranan ta muestra cu e esfuersonan di Gobierno ta dunando resultado, e deficit ta birando surplus y e tasa di debe ta cuminsa stabilisa.

Durante e conferencia di prensa e mandatario a trece dilanti cu pa e promer 3 lunanan di 2019, Gobierno a ricibi mas entrada y a logra baha su gastonan, e resultadonan aki a produci un surplus di casi 7 milyon florin. Pa locual ta e tasa di debe Minister Ruiz-Maduro a informa cu esaki a baha levemente di 77.8 pa 77.3%.

E mandatario a trece dilanti cu desde e momento cu a asumi responsabilidad a bin ta traha serio y duro pa recupera e credibilidad financiero di Pais Aruba. No por lubida cu e situacion financiero hereda di Gobierno anterior ta uno caminda e gobernacion anterior na un forma irresponsabel redobla e debe di 2 pa 4 biyon den apenas 8 aña di tempo y esaki ta trece cune un situacion financiero precario cu no ta facil pa maneha.

Awe segun e mandatario a splica cu e resultado di e promer kwartaal di 2019 ta uno alentador ya cu e ta muestra cu e sacrificio cu ta wordo pidi y duna door di tur hende ta duna su frutonan den tal forma cu nos ta riba e bon caminda pa por cumpli cu e metanan financiero di e aña aki y por recobra asina e credibilidad financiero tan necesario.



Den apenas dos aña di gobernacion Gabinete Wever-Croes pa medio di Minister Ruiz-Maduro como mandatario responsabel a bin ta demostra karakter y tuma decision y a base di trabaonan duro y dedica ta ponendo nos Pais Aruba riba caminda pa un finansa publico manehabel y duradero, e deficit ta birando surplus y nos tasa di debe ta stabilisando.



MINISTER PLENIPOTENCIARIO BESARIL A PARTICIPA NA ENCUESTRO RIBA “GESCHILLENREGELING” NA TWEEDE KAMER



Comision di Asuntonan di Reino di Tweede Kamer a tene awe 29 di mei un asina yama “rondetafelgesprek” riba e tema di e “geschillenregeling” pa Reino Hulandes. Minister Plenipotenciario di Curaçao Anthony Begina, Minister Plenipotenciario di St. Maarten Jorien Wuiten y Minister Plenipotenciario di Aruba Guillfred Besaril a hiba palabra unda nan por a trece dilanti e punto di bista di nan pais riba e tema aki. Minister Besaril a entrega den nomber di Gobierno di Aruba un position paper cu ta hiba e titulo “Het belang van een onafhankelijk geschillenbeslech-ting”.

Minister Besaril den su declaracion na e parlamentarionan a ilustra e situacion den Reino Hulandes cu un ehempel di e situacion den Union Europeo, na unda ta respeta e opinion y punto di bista di e paisnan chikito, manera Dinamarca, Luxumburgo y Hulanda. Esaki tambe mester ta posibel den Reino Hulandes, segun argumentacion di sr. Besaril.

Tur tres mandatario ta di opinion cu e “geschillenregeling” lo mester bini na vigor pronto. Pero si cu e mester ta un “geschillenregeling” bon hica den otro y segun e deseonan di e paisnan Caribense di Reino Hulandes. Esaki lo mester bira un punto importante durante e reuinionnan di IPKO final di juni proximo.

E parlamentacionan a haya ocacion pa haci un pregunta na e tres ministernan. Despues di un schor-sing chikito tabata na turno algun experto riba structura estatal, manera prof. Ernst Hirsch Ballin, prof. Gert Oostindie y prof. Arjan van Rijn pa comparti nan opinion riba e “geschillenregeling” cu e miembronan di e comision di Asuntonan di Reino di Tweede Kamer.

COMISION CONDECORACION REAL ARUBA






Con ta propone un persona?

- Por haci proposicion dor di yena dos formulario.
- E formularionan aki ta obtenibel durante oranan di oficina na balie di Bestuurskantoor na O'stad y San Nicolas. Tambe por download e formularionan for di e website di gobierno: www.gobierno.aw, www.overheid.aw, www.government.aw

Pa mas informacion por yama

Sra. F. Perez-Lopez tel: 5838425
Sra. I. Nicolaas-Ras tel: 5848880

Ta ricibi peticionnan pa
año 2020 entrante dia
28 di mei 2019.
E ultimo dia pa entrega
peticionnan ta dia
9 di augustus 2019.



MINISTER ARMANDO LAMPE

Minister di Enseñansa, Ciencia y Desaroyo Sostenibel

Minister Armando Rudy Lampe:

NUNCA NO A HACI UN ESTUDIO Y TAMPOCO NO TIN UN RAPORT PA ELIMINA TRAIMERDIA



Traimerdia ta existi mas di 20 aña y traimerdia tey pa keda. Traimerdia ta dunando un servicio na nos comunidad cu tin mester, esey kiermen cu tur mayornan cu tin yiunan cu ta bay traimerdia no mester preocupa. Minister di enseñansa Armando Rudy Lampe ta sigura cu traimerdia ta bay continua cu su servicio.

Sinembargo tur loke cu ta wordo bisa of crea tras di mi lomba no ta cuadra cu realidad, e ta puramente un wega politico cu ta wordo haci pa crea duda y un imprecion den comunidad pa motibonan politico. Ta lamenta cu na momento cu esaki sosode no ta wak e interes di e mucha ni e interes di Aruba, pero e interes di nan partido.

Esaki ta un modo y strategia pa purba di traha riba emocion di mayornan. Nos

tur sa cu e mayornan tin un necesidad, ken na Aruba no sa cu e desaroyo economico na Aruba a bay den e direccion cu e ta actualmente, unda cu tur dos pareha ta traha y tin biaha nan mester traha dos trabao.

Segun e mandatario pa e motibonan aki mes tin e necesidad di un traimerdia pa despues di oranan di scol duna guia na e muchanan. Esaki ta un necesidad social y como gobierno nos ta asumi nos responsabilidad y ta continua cu e proyecto di traimerdia. Tur mayor por keda tranquil traimerdia ta continua despues di augustus 2019 y pa e aña escolar cu ta termina pa juli 2020 pero pa semper e proyecto lo sigui continua manera tur aña.

Minister Armando Rudy Lampe ta lamenta cu ta faumenta rumornan falso.

Nunca no a haci un estudio y tampoco no tin un raport pa elimina traimerdia. Traimerdia a demostra cu e ta responde na un necesidad social y pa es motibo aki mes lo continua cu e proyecto aki.

Loke cu tambe ta di lamenta cu e mes un grupo cu ta trece informacion incorrecto a crea duda tambe pa esnan cu ta traha den traimerdia. Pa e motibo aki mes esnan cu ta traha den traimerdia a bin protesta dilanti bestuurskantoor debi cu nan tin mal informacion unda cu a crea FAKE NEWS.

Minister Armando Rudy Lampe a ofrece na tur esnan cu ta traha na traimerdia pa haci un estudio debi cu den enseñansa regular Aruba tin mester di docentenan pa haci e trabao di asistente di docente y di klas. Awor gobierno lo cuminsa cu diferente opleiding cu por ofrece na esnan cu ta traha na traimerdia.

E docentenan di traimerdia ya caba a demostra cu nan tin amor pa muchanan y si nan ta desea sigui studia y haya un miho salario, alabes haya un trabao full time di 40 ora nan por logra esaki. E docente di traimerdia por sigui y desaroya su mes y cuminsa un carera den enseyansa mes, esaki ta un progreso personal y un miho futuro pa cada uno cu ta traha na traimerdia. Minister Lampe ta lamenta cu e oferta aki a keda malintepreta y a causa cu tin bruhacion. Gobierno di Aruba lo sigui continua cu su responsabilidad.

Reforma fiscal ta e Cambio Husto: CAMBIONAN DEN TARIFA DI GRONDBELASTING



BALOR DI PROPIEDAD ENTRE 0-120.000 FLORIN:

Esnan cu tin un propiedad cu un balor entre **0-120.000 florin**, no ta paga grondbelasting mas. E tarifa ta 0%. Esaki ta conta pa 10.700 contribuyente:

0% di residentenan priva na Aruba no lo paga Grondbelasting.



BALOR DI PROPIEDAD ENTRE 120.000 – 250.000 FLORIN:

Esnan cu tin un propiedad cu un balor entre **120.000 – 250.000 florin**, e tarifa ta baha cu mita, y e tarifa ta bira 0,2%. Esaki ta conta pa 17.779 contribuyente: 60% di residentenan priva na Aruba a conoce rebaho di Grondbelasting.



BALOR DI PROPIEDAD ENTRE 250.000 – 500.000 FLORIN:

Esnan cu tin un propiedad cu un balor entre **250.000 – 500.000 florin**, e tarifa ta 0,3%. Esaki ta conta pa 8.996 contribuyente: 30% di residentenan priva na Aruba NO a conoce cambio di Grondbelasting.



BALOR DI PROPIEDAD ENTRE 500.000 – 750.000 FLORIN:

Esnan cu tin un propiedad cu un balor entre **500.000 – 750.000 florin**, e tarifa ta 0,4%. Esaki ta conta pa 3.098 contribuyente: 10% di persona a conoce aumento di Grondbelasting.

E cantidad ta wordo parti den 2:

1. 1859: 6%: A conoce aumento entre 0 – 500 florin
2. 1239: 4%: A conoce aumento di mas cu 500 florin



Treciendo un balansa husto
pa tur ciudadano !


 A portrait of Minister Dangui Oduber, a man with short dark hair, wearing a dark blue suit, white shirt, and a patterned tie. He is smiling and looking directly at the camera. The background is a light blue and white geometric pattern.

MINISTER DANGUI ODUBER

Minister di Turismo, Salud y Deporte

DIRECTOR DI SVB TA ENTREGA CUENTANAN ANUAL 2018 NA MINISTER DANGUI ODUBER

Diamars atardi, director di Banco di Seguro Social, ir. Edwin Jacobs, den presencia di hefe di Departamento di Finanzas di SVb, sr. Javier Rasmijn, a haci entrega di e cuentanan anual di e fondonan administra pa SVb y e relato anual di e banco den un forma particular na Minister Dangui Oduber. Director di SVb a entrega e documentonan riba un usb stick, simbolisando asina e transformacion cu SVb ta haciendo di un organizacion burocratico tradicional pa uno moderno y digital.

Cu e entrega di e relatonan, SVb ta cumpli cu articulo 16 inciso 2 di e ley di e Banco di Seguro Social, cual ta prescribi cu prome cu dia 31 di mei SVb mester entrega esaki nan.

Director di SVb a informa Minister Dangui Oduber, cu durante 2018 e fondonan di mas importante cu SVb ta administra, esta e fondo di pension di behes y di vuides, a sigui den e proceso di recuperacion. E fondonan di e seguronan general conhuntamente a conoce un surplus di un 22 miyon florin. Cu e surplus aki, e e reserva di e fondonan ta keda fortifica. E director a mostra cu e reservanan aki ta inmensamente importante pa cubri e deficitnan cu ta premira den e di dos mitar di e siguiente decada.

Sr. Jacobs a expresa tambe su preocupacion pa loke ta e fondonan di e seguronan di trahador. E resultado di e fondonan di malesa y accidente hunto ta mostra un deficit. Sr. Jacobs a informa cu SVb ta studiando kico ta ocasionando esaki y proximamente, si ta necesario, lo presenta proposicionnan pa sana e fondonan aki.

Sr. Jacobs a finalisa pidiendo atencion di gobierno pa maneho di absentismo den e sector publico. E absentismo den sector publico ta keda hopi halto y di parti di gobierno no tin mucho movicion pa atende cu esaki, mientras cu un parti grandi di absentismo ta comportacion. Asina sr. Jacobs a informa cu tin empleado publico cu ta notifica mas di 50 biaha den un aña y masha poco ta keda haci pa atende e comportacion aki. Ademá sa constata cu empleado publico ta notifica AO y no ta presenta pa control y departamento no ta al tanto mes. Sr. Jacobs a informa Minister Dangui Oduber, cu SVb a calcula cu na 2011 absentismo den sector publico a costa gobierno y comunidad 28 miyon florin. Sr. Jacobs na e ocasion aki a pidi atencion di gobierno pa e asunto aki.

Minister Dangui Oduber na su turno a expresa su gratitud



na henter e team di SVb y nan Consejo di Supervision pa a cumpli cu e ley di SVb. Minister Dangui Oduber a mostra su satisfaccion pa loke ta e resultadonan den e fondonan y ta comparti e preocupacionnan tambe. Minister tin pleno confianza cu e preocupacionnan lo keda atendi debidamente y lo sigui percura pa fortifica e fondonan bao administracion di SVb, ya cu e fondonan aki ta contribui grandemente na bienestar di nos comunidad.

Finalizando, Minister Dangui Oduber a desea SVb hopi exito den e transformacion di nan organizacion pa uno digital.

Inversionistanan ta demostra nan confiansa

MANEHO EXITOSO DI TURISMO DI ARUBA TA KEDA REFLEHA DEN E 900 MIYON DOLLAR DI INVERSION COMERCIAL



condominiums, cual ta un proyecto cu pa hopi aña a keda para. Awor a bin un inversionista nobo, kende lo inyecta 30 miyon di dollar den e proyecto aki. No por laga afo un otro 60 miyon di dollar cu lo keda inverti pa construccion di Xavier University School of Medicine, cual lo bira e cas di hopi estudiante internacional aki na Aruba.

Minister Dangui Oduber: "Cada un di e inversionnan aki nifica mas empleo, mas estimulo den nos economia y tambe un

entrada stabiel pa Gobierno di Aruba."

Como e mandatario encarga cu turismo, Minister Dangui Oduber ta bisa di lo sigui firme cu e maneho actual pa turismo. "Lo sigui enfoca riba e turista di calidad. Nos lo inverti na unda mester pa asina atrae mas di e turistanan aki, como tambe haci Aruba un luga atractivo pa inversionista. Ta danki na turismo nos economia ta draai y di forma responsabel nos lo sigui engrandece esaki", e mandatario a expresa den un tono firme.

E no ta un secreto cu Aruba su pilar economico mas fuerte ta turismo y cu sin e pilar aki, Aruba su economia no lo por draai como debe ser. No obstante cu Aruba ta ser considera como e perla di Caribe, pa por mantene e pilar economico aki bibo, ta rekeri un maneho structural cu ta enfoca riba e asina yama 'turista di calidad'. E turista di calidad ta esun cu ademas di bin relaha na nos isla, ta laga atras un bon cantidad di placa den nos economia. Na su turno, door di ta un isla atractivo pa e turista di calidad, ta haci cu e ta atrae inversionistanan cu tambe ta engrandece nos economia.

"Ya caba for di tempo di ta den oposicion, mi persona a bin ta papia riba e enfoca pa e turista di calidad. Awor cu pueblo di Aruba a duna e confiansa pa ta den gobernacion, nos a sali crea un maneho structural cu ta percura pa eleva e calidad di turismo cu Aruba ta ricibi. Awe nos ta mira e fruto di e maneho aki ta ser refleha den e mas cu 900 miyon dollar di inversion comercial cu turismo ta trece cu ne", Minister Dangui Oduber a expresa. E mandatario ta splica cu e inversionnan aki ta na beneficio di henter pueblo y como mandatario encarga, lo sigui haci tur cos posibel continua den e rumbo aki.

Inversionnan

E 900 miyon dollar aki cu ta ser papia di dje, ta reparti den un total di 5 proyecto. Esakinan ta encera e proyecto 'Gateway 2030' di aeropuerto di Aruba, balora na 275 miyon dollar. Transformacion di e area di waf actual na Oranjestad den un 'Port City', balora na 500 miyon dollar. Inversion di 35 miyon dollar pa renobacion y expansion di ImSan, unda lo ta enfocando riba turismo medico. Renobacion di Ex Aqua

ARUBA MEETS IN San Nicolas

Come and experience our local way of life

MAY 29 | 7-10 PM
2019

MAIN STREET, SAN NICOLAS

LOCAL FOOD ISLAND

MULTICULTURE FOOD ISLAND

SPECTACULAR HISTORICAL SHOW

LIVE BANDS

ARUBA

Ministerio di Turismo,
Salubridad Publico y Deporte

Prome Minister Evelyn Wever-Croes:

PREMIER EVELYN WEVER-CROES A TUMA DESPEDIDA DI PRESIDENTE DI EERSTE KAMER

Diahuebs na Hulanda, Presidente di Eerste Kamer na Hulanda Ankie Broekers-Knol, despues di 6 aña como Presidente di Eerste Kamer, ta bandona e puesto. Señora Broekers-Knol no por wordo re-eligi. Sra. Broekers-Knol semper tabata tin un luga special den su curason pa Aruba y Parlamento di Aruba semper por a conta cu su sosten. Ta pa e motibo ey, Premier Evelyn Wever-Croes a gradici'e personalmente y a entreg'e un regalo, un bunita buki di Aruba.

Den un reunion cu señora Broekers-Knol Premier Wever-Croes a comparti e impacto di e crisis di Venezuela riba nos pais Aruba, riba diferente tereno. Señora Broekers-Knol ta comparti preocupacion di Gabinete Wever-Croes den esaki y sigura cu Eerste Kamer t'ey pa yuda Aruba den esaki.

Premier Wever-Croes ta desea señora Ankie Broekers-Knol exito.



MAS DI E AUDIENCIA CU PAPA DI ROMA:





GOBIERNO DI *ARUBA*

*UN
Feliz Dia*

ISLAONLINE
PA INFORMACION
CORECTO Y BERDAD